



NotiKep

Kooperativa di Spar i Krédito Empleadonan Petrolero

"Sólido i konfiabel"



Edishon, Desèmber 2005

Kontenido:

- Mensahe di Presidente
- Direktiva ta infomá
- Proseso di Fiansa
- Resultado enkuesta di KEP
- Artikulo finansiero hubentut
- Dies tep pa garantisá un temporada di fin di aña felis

Direktiva di K.E.P.

Presidente	<i>E. Hanley</i>
Sekretario	<i>L. Brug</i>
Tesorero	<i>F. Candelaria</i>
Vise Presidente	<i>R. Felicia</i>
2º Tesorero	<i>E. Manuel</i>
Komisario	<i>R. Marcos</i>

Konseho di Supervishon

Presidente *R. Van Kwartel*

Komishon di Krédito

Presidente *R. Maduro*

Direktora di Ofisina

Sra. L. Carol

Redakshon NotiKEP

Sra. Ethlyn Hanley

Orario di ofisina:

Djaluna - Djabièrnè: 07:30-17:00
 Adrès: Schottgatweg West 359
 Tel.: 8683290; 8695541; 8690054
 Faks: 869-3646

MENSAHE DI PRESIDENTE.....

Tin vários rason pakiko e temporada di Pasku ta speshal pa nos. Nos komunitat a kustumá ku e diferente fiestanan, pa motibu di nos karakter multi-kultural. Pero loke si ta keda meskos ront mundu, ta e espíritu di Pasku. E pensamentu ku hende ta uni dor di hermandat, pas, bon boluntad i kompreshon. E pensamentu akí ta krusa tur límite di idioma, kultura i religion.

Selebrando nasementu di Kristu, nos ta rekordá ku e poder di su mensahe ta sinta den e abilidad di stima i prekupá pa otro, speshalmente esnan ku ta sufri i ku ta den nesesidad.

Pasku ta indiká ku nos ta yegando na fin di un otro aña. Un aña ku nos por mira atras riba dje i yama danki. Danki pasobra nos a keda bendishoná ku e regalo di mas grandi ku Señor por duna nos, esei ta Bida.

Pasku ta e tempu pa nos apresia i selebrá. Pa nos rekonosé nos bendishonnan, partikularmente e espíritu di amor, generosidad, toleransha, respèt i kompreshon sinsero i realisá ku esakinan ta e fundeshi di nos famia i nos Koperativa. Ku e bendishonnan akí ta bini tambe nos responsabilidat pa sirbi otro. Pa medio di e trabou di boluntario den nos Koperativa, nos ta yuda otronan den tempu di difikultat i asina aportá pa alsa nan kalidat di bida. Pasku ta yena nos kurason ku gratitut di por a haña e oportunidat pa sirbi nos sosionan.

Na nòmber di Direktiva, órganon statuario i personalmente, mi ke gradisi un i tur pa e kompreshon, koperashon, i partisipashon durante aña 2005. Laga nos sigui uni pa hasi KEP e koperativa kampeon. Union ta hasi Forsa.

Mi ke hasi uso di e oportunidat akí pa deseá tur sosio i nan respetivo famianan un **Bon Pasku, i un Próspero aña Koperativo 2006.**

Presidente: *Ethlyn Hanley*

STATÛT NOBO DI KEP



Ku sumo plaser nos ke informá tur nos sosionan, ku nos Statút nobo ta aprobá i ta vigente entrante 25 di sèptèmber 2005. Nos ta súplika tur sosio pa pasa na ofisina i tuma un kopia di e Statút i Reglamentu Doméstiko pa semper bo tin un kopia na man pa keda na altura di e reglanan di nos koperativa.

ORARIO DI OFISINA PA LUNA DI DESÈMBER 2005

**23 DI DESÈMBER 2005
07:30 12:00**

**30 DI DESÈMBER 2005
07:30 12:00**





DIREKTIVA TA INFORMA.....

Durante e aña 2005 Direktiva a sigui hasi su esfuerso pa skucha i sirbi e sosionan di KEP, dor di su desempeñu kontinuo pa mehorá e prosesonan di nos Koperativa.

- Durante e aña aki, nos a trata e kambionan di nos statuto segun e kambionan di Buki 2 di nos Kódigo Sivil. Adaptando na e kambionan aki nos a hasi uso di e oportunidat pa mehorá nos Statüt.

Nos a tene kuenta ku e petishon di nos sosionan i a inkluí tambe e kompañero di bida di e sosio, ku tambe por bira miembro basta ku e ta kumpli ku e rekisitonan deliniá den e statuto nobo, ku ta vigente for di 25 di sèptèmber 2005.

- Pa sigui mehorá nos servisio i benefisionan na miembro nos a tene un enkuesta bou di nos sosionan pa nos por skucha nan nesesidat i traha mas dirigí. Esaki lo bira un ehersisio ku nos lo bai tene riba un base regular pa keda den kontakto ku nos sosionan pa sirbi nan mas mihó.
- E enfoke riba kresementu di miembresia, ketu bai ta haltu riba e lista di prioridat. Nos a nota un kresementu leve durante 2005, pero mester sigui riba un base struktural di kresementu dentro di e koperativa, especialmente ku miembro hóben, pa garantisá kontinuashon di e koperativa.
- Durante e aña 2005, tambe Banko Sentral a hasi un ouditoriá serka KEP i ku gran satisfakshon nos mester informá nos sosionan ku e resultado tabata hopi bon.
- Nos a sigui e aña ku diferente kurso di konsientisashon pa miembronan nobo, kursonan finansiero, kapasitashon pa direktiva i otro órganonan statutario i charlanan edukativo.
- Den kuadro di globalisashon nos a partisipá tambe na e konferensha di CCCU i CCCA na kursonan di bon gobernashon organisá pa Fekoskan i CCCU aki na Kòrsou.



Ku satisfakshon nos mester apuntá ku gradualmente e partisipashon na kursonan organisá pa e Komishon Edukativo ta bon bishita.

- Teniendo kuenta ku nos ta rumbo pa selebrá nos 40 aña di eksistensia, direktiva a apuntá un grupo di sosio di promé ora pa dokumentá e historia di KEP.
- Nos a sigui dokumentá tambe tur e prosesonan atministrativo di nos koperativa asina ku nos por garantisá kontinuashon i kumplimentu ku lei.
- Fin di novèmber último nos website ta 'life'. Esaki tambe ta un hèrmènt ku lo yuda nos mehorá e kontakto ku nos sosionan.
- Konsiente ku nos mester kumpli tambe ku nesesidat di nos personal, pa nan por traha motivá i duna bon servisio na kliente, nos a traha tambe dediká pa mehorá e kondishonnan di trabou.

Esakinan ta algun di e prosesonan ku nos a traha ariba durante 2005. Direktiva ta kumpliando kasi 80% ku e plan di maneho pa aña 2005, pero semper tin espasio pa sigui mehorá. Nos lo ke mira mas partisipashon aktivo di nos miembresia na nos reunionnan i lo bai traha riba esaki. Sin partisipashon di nos miembronan ta difisil pa nos por sigui traha pa implementá kosnan segun nesesidat di nos miembronan. No keda leu for di nos, laga nos huntu ban engrandese nos Koperativa den aña 2006. Direktiva ta ekstendé un man na su sosionan, laga nos tene man i huntu ban kana riba e kaminda di progreso kontinuo.

Un danki ta bai na tur sosio ku di un òf otro manera a hasi aña 2005 un aña eksitoso. Nos no a yega ainda, laga nos sigui traha duru pa adelanto di nos futuro. Un felis Pasku i un aña 2006 yen di prosperidat.

“Never give up, for that is just the place and time that the tide will turn”

Harriet Beecher Stowe.

PROSESO DI FIANSA.....

(skirbi pa F. Candelaria)



Fiansa ta un proseso klave di nos koperativa di spar i krédito. Pa medio di fianza KEP ta yuda e sosio kumpli ku su nesesidatnan i asina ta kontribuí na yud'é realisá su metanan finansiero.

Tambe e aktividatnan di krédito ta generá entrada pa KEP por kumpli ku e servisio di krédito i ofresé otro benefisionan na su sosionan.

Aktualmente nos sosionan por apliká pa fianza na KEP serka Komishon di Krédito òf via di Loan-officer.



Pa risibí servisio di Loan-officer mester traha sita adelantá i presentá riba e dia i ora kumbiní.

Di e forma aki e sosio ta haña oportunitat pa manehá su tempu dor di palabra un dia i ora ku ta kombin'é i por ser atendé sin tin mester di warda innesesariamente. Naturalmente mester kumpli ku e demas rekisitunan, manera entre otro entrega último slep di salario i dos último statement kompletu di banko pa sigurá ku enbèrdat e servisio por kana bon.



Ta p'esei semper ta bon pa nos konsulta e polítika di fianza na momentu ku nos ta bai hasi petishon di fianza pa asina nos kumpli ku tur e rekisitunan i evitá tardansa den e proseso.

Komishon di Krédito ta brinda e oportunitat pa hasi petishon di fianza riba djaluna i djaweps despues di 5'or di atardi.

Pa hasi uzo di e posibilidat aki no ta nesesario pa e sosio traha sita promé, sino simplemente ta akudí riba un di e dos dianan menshoná i ta sinta warda su bür. E posibilidat aki ta pa e sosio ku no por presentá den oranan di ofisina i asina tòg ta haña oportunitat pa hasi su petishon di fianza den un ora ku ta kumbiniente p'e.



Direktiva huntu ku Komishon di Krédito ta evaluá tantu e polítika di fianza komo e forma ku ta duna servisio na nos sosionan riba un base kontinu. Pa medio di kontaktonan

Un tendensia ku ta notabel ta e hecho ku mas i mas nos sosionan ta demonstrá preferensia pa hasi uzo di servisio di nos Loan-officer ora nan ta hasi petishon di fianza.

Nos a konstatá ku di kada dies petishon di fianza ku ser hasi un promedio di entre seis i shete ta ser hasi serka Loan-officer.

Por saka algun konklushon for di e opservashon aki, esta:

- ku nos sosionan ta preferá di hasi petishon di fianza segun sita,
- ku nos sosionan ta preferá di bishita KEP pa hasi petishon di fianza den oranan di ofisina,
- ku nos sosionan ta apresia e servisio ku nan ta risibí serka Loan-officer.

Den kuadro di e ophetivo pa kontinuamente optimalisá nos servisio, Direktiva huntu ku Komishon di Krédito ta studia e posibilidat pa amplia e posibilidatnan pa hasi petishon di fianza.

Pronto KEP lo introdusí e posibilidat pa hasi petishon di fianza usando medionan elektróniko.

Nos ta den fase final di implementashon di nos *website* ku lo ofresé entre otro e posibilidat ku un sosio por hasi petishon di fianza for di su sitio di trabou òf for di su kas.

Tambe nos tin pensa di amplia e posibilidat pa hasi petishon di fianza serka Loan-officer. Den e kuadro aki Loan-officer lo ta disponibel tambe riba djaluna i djaweps pa atendé petishon di fianza segun sita despues di 5'or di atardi.

Direktiva ta spera ku dor di introdusí e fasilidatnan aki nos ta kumpli ku deseo di nos sosionan i asina kontribuí na mehorá nos servisio.

**Kòrda ku KEP
semper mester
ta e opshon
number unu
ora ku sosio
mester di un fianza.**



RESULTADO ENKUESTA DI KEP

(skirbi pa E. Manuel)

Durante luna di ougùstùs 2005, KEP a tene un enkuesta bou di su miembronan pa por haña dato kon e miembronan ta eksperienhá e servisionan ku KEP ta ofresé aktualmente i kiko ta e servisionan nobo ku e miembronan lo ke pa KEP introdusí òf mehorá.

Remarkabel ta ku solamente 124 miembro a yena e enkuesta, ku ta solamente 6% di un total di aproksimadamente 2200 miembronan registrá na KEP. Un enkuesta ta un hèrmènt masha valioso, pero si e porsentahe keda abou, e por duna informashon ku no ta reflehá tur e miembresia. **P'esei direktiva kier suplika tur miembro pa e próksimo bia, nan ta mas aktivo den yenamentu di enkuestanan** asina abo, komo miembro, por duna direktiva direkshon unda abo ke pa nos bai ku nos kooperativa.

E enkuesta tabatin total shete (7) pregunta, di kual un resúmen di e kontestanan ta presentá aki bou:

1) Pa kuantu aña bo ta miembro di KEP?

Di e miembronan ku a yena e enkuesta, 58% ta miembro pa mas ku 20 aña, 21% ta miembro entre 11-20 aña, 3% ta miembro entre 5 pa 10 aña, 16% ta miembro entre 1-5 aña i 1% ta miembro pa ménos ku 1 aña. Por konkluí ku KEP tin 78% di hende ku ta miembro pa mas ku 11 aña i ku entre 5 pa 10 aña pasa no tabatin hopi miembronan nobo ku a drenta KEP òf ku no a kompletá e enkuesta (3%). Por nota tambe ku den e último 5 añanan KEP a atkeri alrededor di 17% di e miembronan nobo, pa asina KEP por garantisá un kresementu di e miembresia i forma un base sólido pa por sigui fia i krese.

2) Kon satisfecho bo ta ku e servisionan ku KEP ta ofresé (p.e. na bali, telefon, amabilidad di personal, informashon, direktiva, etc)?

88% di e miembronan bou di 10 aña i 91% di e miembronan ariba 11 aña ta satisfecho òf hopi satisfecho ku e servisionan di KEP. Solamente 4% di e miembronan ariba i abou di 10 aña no ta satisfecho ku e servisionan aktual di KEP i 4% ta hopi insatisfecho ku e servisionan di KEP. Direktiva ta analisando e motibunanan menshoná pa asina por mehorá e puntonan aki.

3) Aparte di e servisionan finansiero ku KEP ta ofresé kaba (TDS, Depósito, Fondo entiero), tin algun servisio mas ku KEP lo mester duna adishonal òf mehorá?

Mayoría di e miembronan a ekspresá ku nan ta satisfecho i ku por drecha sierto di e servisionan e.g TDS. Mayoría ta anhelá pa servisionan nobo. Pregunta #7 ta duna un bista mas amplio riba e kontestanan.



Si resientemente bo a hasi un petishon pa fiansa, kon bo ta evaluá e servisio risibí dor di e Loan officer i/o komishon di krédito?

Di e miembronan ku ménos ku 10 aña den KEP, 48% a evaluá e servisio risibí dor e Loan officer bon/ekselente i 38% a evaluá e servisio risibí dor di Komishon di Krédito bon/ekselente. 0% a evaluá e servisio malu i 4% mas òf ménos. Di e miembronan ku mas ku 11 aña den KEP, 81% a evaluá e servisio risibí dor e Loan officer bon/ekselente i 67% a evaluá e servisio risibí dor di Komishon di Krédito bon/ekselente. 2% a evaluá e servisio malu i 2% mas òf ménos. Direktiva ta analisando e kousanan menshoná pa por mehorá e parti di servisionan aki tambe.

5) Bo a hasi un fiansa resientemente na un banco lokal i dikon no serka KEP?

Di e miembronan ku ménos ku 10 aña den KEP, 68% no a hasi un fiansa resien na un banco lokal i di e miembronan ku mas ku 11 aña ta 79%. Esaki ta demonstrá ku e miembronan ta hasiendo bon uso di KEP. E miembronan ku ménos ku 10 aña den KEP, ku si a hasi un fiansa resien na un banco lokal a indiká ku ta dor ku nan no tabatin sufisiente fondo na KEP. E miembronan ku mas ku 11 aña den KEP, ku si tabatin un fiansa resien na un banco lokal a indiká ku tabata pa por ehèmpel hipotek, areglonan mas bentahoso entre e banco i un otro negoshi, proseso di fiansa mas rápido ku KEP, etc. Direktiva a tuma nota di tur e puntonan menshoná i lo bai traha pa por satisfasé nos miembronan, pero semper manteniendo un base sólido pa rekobrá nos fiansananan.

6) Bo grado di satisfakshon a kambia (mas mihó, keda meskos, mas pió) den e último 12 lunanan?

En general un 84% su satisfakshon a keda meskos, 12 % su satisfakshon a drecha i solamente 4% su satisfakshon a bira pió. Aunke ku un 96% ta hopi satisfecho, tòg direktiva ta analisando e motibunanan menshoná dor di e 4% pa asina nos por satisfasé tur nos miembronan mas tantu ku ta posibel.

7) Kiko ta e tres kosnan mas importante ku BO por drecha òf implementá pa por sirbi bo nesidadnan mas mihó?

Entre tur e kosnan mas importante menshoná dor di tur e miembronan ta:

- 1) plan pa spar pa yu,
- 2) rebaho ku karnèt di KEP
- 3) proseso di fiansa mas rápido.

Direktiva ta analisando e diferente puntonan menshoná pa por bini ku un plan di akshon pa por mehorá e servisionan aki i satisfasé e deseonan di nos miembronan te kaminda ku esaki ta posibel.





KON TA MANEHA BO SITUASHON FINANSIERO

(skirbi pa E. Hanley)

Algún luna pasa, Komishon di Edukashon di KEP a tuma e iniciativa i a aserka Sr. Earl Balborda pa organisá un kurso riba manejo finansiero pa su miembronan. Sr. Balborda, ta produktor i presentadó di e programa "Bo Sèn" ku ta pasa djasabra mainta na Z-86. Den e kurso di manejo finansiero a bai mas leu ku loke hopi konosé komo 'budgetering'. Den e kurso aki tambe a enfoká riba strategianan general ku un hende mester pa yudé alkansá independensha finansiero.

Basa riba e éksito di e dos kurso ku a ser duna pa e sosionan, Komishon di Edukashon a disidí di hasi algu similar pero kompletamente dirigí riba e hóben ku ta studiando òf ta bai studia. Sr. Balborda a aseptá e reto aki ku hopi entusiasmo. Manera e mes a bisa " ... un oportunidat asina aki ta bal oro pasobra ainda hopi di e hóbenan a siña e sistema robes di atendé ku sèn ... aworaki nan ta haña un oportunidat pa sali hasié bon. "

E kurso a tuma lugá riba djasabra 9 di yúli; a kontá ku partisipashon di 12 hóben. Den un manera hopi interaktivo e hóbenan a siña manera nan konkreto pa nan atendé ku sèn den e fase di bida ku nan ta aden. Tambe nan a haña 12 regla di sèn ku nan mester sa komo hóben studiante.

Na final di e kurso hopi di e hóben partisipantenan a ekspresá ku un manera nobo di wak kos a nase serka nan. Ku pèrmit di Sr. Balborda nos ta publiká e 12 reglanan ku tur hóben mester sa di sèn.



12 regla ku tur hóben ku ta / òf ta bai studia mester sa di sèn!

1. Mayoria hende tin problema finansiero pasobra nan ta tuma konseho robes serka hende robes. Nan ta tuma konseho serka hende pover òf serka hende ku tin algu di bende. Tuma konseho serka un hende ku sa mihó pasobra e a siña esei kaba. Wak su situashon anto husga pa bo mes. Hopi biaha hasta mayor ta duna mal konseho ku bon intenshon.
2. Tuma un trabou pa loke bo por siña no pa loke e ta paga. Traha pa e abilidadnan ku bo ta atkerí ku lo bo por usa den futuro. Skohe esaki riba un trabou ku ta paga bon pero ta destruí bo kapital humano.
3. Den e mundu ku nos ta biba aden bo mester di dos edukashon. Un pa bo mes anto un pa bo sèn. Bo mester prepará bo mes pa siña atendé ku sèn. No ta importá kiko bo speshalisashon lo ta. Bo mester komprondé sèn tambe.
4. Komprondé e poder di palabra. Aparte di alimentá bo mente ku palabranan manera matemátika, i kímika, bo mester alimentá bo mente ku konseptonan finansiero tambe.
5. Sa e diferensha entre un propiedat (asset) i un debe (liability). Sa e diferensha entre un bon debe i un mal debe. Komprondé kon sèn ta krese i kon e ta bira ménos.
6. Reta bo mes pa superá bo miedunan. Hopi biaha éksito grandi ta para na otro banda di loke bo tin miedu di dje.
7. Rikesa ta un estado mental. Reta bo mes pa ser riku. Bo sa kon hende riku ta pensa? Abo ta pensa manera hende eksitoso òf no?
8. Maske kuantu bo entrada ta, biba bou di bo forsa i spar. Train bo mes for di awor aki pa gasta ménos ku bo tin.
9. Siña konosé e manera mas barata di hasi i kumpra tur loke bo ta gusta. Si bo ta gusta bai sine por ehèmpel, haña e dia i ora ku ta mas barata pa bo hasi esei.
10. Traha un trabou ku tin di haber ku loke bo kier bai hasi den futuro. Si bo kier bai traha den un banko ta mihó bo tuma un trabou di limpieza ku no ta paga muchu si bo bai hasi algu otro.
11. Estudio ta un di e mihó imbershonnan ku bo por hasi den bo bida. Pa saka máximo di e imbershon aki bo mester hasi e periodo mas kórtiku posibel. Purba kaba bo estudio den ménos tempu posibel.
12. Studia pa nivel di pensa i no pa konosementu. Loke bo ta siña awe probablemente no tabata eksistí dies aña pasa anto tampoko lo tin balor aki dies aña.



DIES TEP PA GARANTISÁ UN TEMPORADA DI FIN DI AÑA FELIS

(skirbi pa Sra. E. Hanley)

Pasku ta un temporada hopi dushi di aña. Hopi hende ta sinti nan mes asina bon den e temporada akí ku nan ta lubidá riba sierto kosnan esensial. Aki mi ke kompartí algun tep pa nos tene kuenta kuné durante e temporada di Pasku.

1. Gasta sèn na midí. Hasi kompra segun nesesidat. No gasta sèn innesesariamente.
2. Temporada di Pasku ta un tempu ku hopi hende ta bira verkout, tene kuenta ku esaki i tuma medidanan nesesario pa evitá di bira malu durante e temporada akí.
3. Evitá ekseso di alkohòl. Hopi hende ta lubidá ku ta un temporada di pas i amor pa selebrá den seno familiar i nan ta tuma demasiado alkohòl. Esaki por dañá henter e temporada di fiesta. Si bo ta bebe no stür i so bo ta stür no bebe.
4. Si bo bebe di mas, perkurá pa bebe hopi awa. Esaki por kontrarestá e ekseso di alkohòl.
5. Kome balansá. Durante e dianan di fiesta nos ta kome hopi kos pareu. Esaki por kousa indigestion.
6. Seguridat / Higièna den kushina. Nos tin tendensia di kumpra hopi kos i stòk nos eiskast. Esaki por kousa ku e eiskast no ta fria bon i konsekuentemente bakterianan ta oumentá. Si bo eiskast ta hopi yen, kòrda ahustá e temperatura.
7. Si bo ta bai fiesta, paga bon tinu si tin kuminda di laman, ku esaki no a keda pafó di eiskast pa largu tempu. Salada prepará ku mayonès tambe por kousa venenamentu.
8. Chèk bo stòk di dekorashon promé ku bo bai hasi kompra, pa no kumpra kos ku no tin mester.
9. Anochi ora di drumi òf ora ta sali kas, kòrda saka tur lus dje palu di Pasku i òf esnan di kura for di koriente.
10. I finalmente, PAGA TINU KU VÜRWERK. Esaki ta konta pa henter famia.



Ofisina ta Informá

YUDA NOS KEDA DEN KONTAKTO KU BO

Nos ta hasi tur nos esfuerso pa tene nos banko di informashon korekto. Esaki ta pa kumpli ku reglanan di lei i mas importante pa nos keda den kontakto ku bo sosio. Pa hasi esaki nos tin mester di bo koperashon. Resientemente bo a kambia di adrès, status, email, telefon? Por favor pasa serka nos un ratu i yena tur e kambionan asina ku nos por keda den kontakto ku bo. Bo por manda e informashon tambe via di nos website na www.kepcreditunion.org òf yama nos na 8683290.



MIEMBRESIA PA FAMIA

Psssst..... bo a tende ku bo famia yega tambe por bira miembro di KEP? Bo tabata sa ku bo yunan ku tin nan mes entrada, bo kasa ku tin su mes entrada, bo kompañera di bida ku ta kumpli ku e rekisitonan di nos statuto tambe por bira miembro di KEP? Bo a plama e palabra serka nan? Duna nan e mihó regalú di Pasku, introdusí nan na nos koperativa KEP. Tur ta bon bini. Mas grandi nos koperativa ta ku hende hóben, hende entusiasma, mas grandi nos posibilidatnan ta pa introdusí mas benefisio. Sera nan konosí, nos



KAMBIO DI INTERES RIBA KUENTA DEPÓSITO

Entrante 1 di òktober 2005 interes riba kuenta di depósito a bira 4.5%.



IMPLEMENTASHON DI WEB-SITE

Dia 25 di novèmber último KEP a implementá su web-site ku a bai kompañá ku presensha di diferente medianan di prensa. E web-site di KEP ta konsisti di un parti ku ta duna informashon general di KEP i un parti di "business" kua ta e parti aktivo pa miembronan. Ku introdukshon di e web-site lo bira posibel pa miembronan hasi petishon di diferente servisio ku KEP ta brinda usando medianan elektróniko.

KOMISHON DI KRÉDITO

Ta informá ku entrante 15 desèmber 2005 te ku 15 yanüari 2006 lo no tin sita pa fianza. A la bes Komishon di Krédito ta deseá tur sosio felis diano di fiesta i kòrdá gasta sèn na un manera responsabel.